

**PSE-EE.** Emilio Gebarak hitzaldia eman zuen atzo, Ramon Rubial Fundazioak antolatuta

# Gebara: «Porrotera eraman behar da agintean dagoen nazionalismoa»

Gaur egun lehentasuna ETaren aurkako borroka eta Gernikako estatutua direla esan du

Gurutze Izagirre | DONOSTIA

Emilio Gebararen ustez, «gaur egun bi lehentasun nagusi daude Euskadin: ETaren aurkako borroka, batetik, eta estatutua guztiz betetzea, bestetik». Horretarako EAJk, PSE-EEK eta PPK adostasunera iritsi beharko dutela esan zuen. Adierazpen horiek Donostian prentsurrekoan egin zituen. Ramon Rubial Fundazioak antolatuta, Miguel Buen PSE-EEko Gipuzkoako Foru Aldundiko batzarkidea, Fundazioko lehendakari Lentxu Rubial eta Emilio Gebara bera zeuden prentsurrekoan. Emilio Gebara Arabako EAJko diputatua izan zen, eta datozen hauteskundeetan independente moduan PSE-EEko zerrendetan aurkeztuko da.

Prentsurrekoa arratsaldeko 17:30ean eman zuten. Eta Emilio Gebarak *Nazioa nazionalismoaren aurka* izenburupean eman behar zuen hitzaldiaren harira eman zuten. Gebarak izenburu hori Albert Einsteinen pentsamendu batetik ekarri zuen. Albert Einsteinek zioen iturriak, maiz, ibaiak daraman ura ez duela gustuko. Hori Gebararen ustetara ekarrita, euskal nazioak euskal nazionalismoa egiten ari den bidea ez duela gustuko iritzi zion.

## «Independentziaren utopiari uko egin behar zaio»

Prentsurrekoaren ondoren, arratsaldeko 19:30ean, hitzaldia eman zuen. Bertan esan zuen «independentziaren utopiari» uko egin behar zaiola nazio bat osatu nahi bada. Bere ustez, euskal nazioan sinesten duenak, egun agintean dagoen euskal nazionalismoaren porrot ideologikoa eta politikoa biltzen saiatu behar du. Gebararen arabera, euskal nazionalismoak independentziaren aldeko apustua egingo balu «naziorik gabe geratuko ginateke».

Bere iritziz, gaur egungo euskal nazionalismoak definizio etnikoa egiten du nazionalismoaz, talde homogeen baten aldekoa da eta independentzia politikoa nahi du. Euskal nazionalismoak «doktrina» hori berrikusi beharko lukeela uste du, gaur egungo munduaren eta Europaren norabidearekin bat ez datorrelako.

Bere ustez, euskal nazionalismoa baliagarri izatetik, 1998tik

## ESANAK

### EMILIO GEBARA

(PSE-EEko hautagai independentea)

«EAJk, PSE-EEK eta PPK gutxienerako adostasuna iristeko gai izan behar dute»

«Euskadi nazioa izan daiteke estaturik izan gabe eta Espainiaren barruan egonda»

«Lizarra-Garaziren porrota ikusita, Ibarretxeren plana sortu dute, helburu bera daukan proiektua»

aurrera, porrot egin duen nazionalismo izatera pasa da, «integratzaile izateari utzi diolako». Dena den, hauteskundeetan emaitza onak eman dizkiola onartu zuen.

### «Lizarra-Garazi itun miserablea eta lotsagarria izan zen»

Indar abertzaleak batu eta «proiektu soberanista» baten aldeko apustua egin zuten 1998an Lizarra-Garaziren sorrerarekin. Bere ustez, «talde terroristak batekin egindako itun miserablea eta lotsagarria izan

zen». Alderdi sozialista eta popularri ez zitzaion bertan sartzeko aukerarik eman; hori nazionalismo «etnizista eta totalitarioa» da, bere iritziz.

Gebarak honakoa ere esan zuen: «Euskadi nazioa izan daiteke, estatua izan gabe eta Espainiaren barruan egonda». Bere ustez, EAJk badaki independentzia ez dela bideragarria eta gainera kaltegarria izan daitekeela garapenerako. Horregatik ez du Ibarretxek argi eta garbi aurkeztzen.

Bere arabera, EAJk estatuto-

ari uko egiten dio ia guztia beteta dagoelako: «1998an gizarte segurantzak bakarrik falta zen lortzeko, orduan beste gatazka-gune bat sortzen lagundu zuen: Lizarra-Garazi». Horren porrota ikusita, Ibarretxe plana aurkeztu dutela esan zuen, filosofia eta helburu bera daukana.

Bere ustez, boto nazionalista aldatuko da proiektu alternatibo bat sortzen bada ETaren aurka eta Estatutuaren alde. Eta momentu hauetan, PSE-EE ikusten du proiektu hori lideratzeko gai.



GARI GARAIALDE / ARGAZKI PRESS

Lentxu Rubial, Emilio Gebara eta Miguel Buen, atzo, Donostian.

## PRESOAK


### Petra Elserrek babesa eskatu du Espainiako Auzitegi Konstituzionalean

Erredakzioa | DONOSTIA

Petra Elser preso alemaniarren defentsak babes helegitea jarri du Espainiako Auzitegi Konstituzionalean, 14 hilabete igaro direlako behin-behinean kartzelatu zutenetik, eta, baldintzapeko askatasuna ukatzeaz gain, ez diotelako ahozko epaiketarako egunik jartzen.

Elser 1996an atxilotu zuten, Frantzia, bere haurarekin eta bere bikote Juan Luis Agirre Leterekin batera. ETAkoa izatea egotzi zioten, eta 30 hilabeteko kartzela zigorra jaso zuen, errugabea zela esan arren. Zigorra osorik bete ostean, beste 17 hilabetez espetxeratu zuten, Espainiak estradizioa eskatu zuelako. Gero, urtebete egin zuen aske, 2001ko azaroan estraditatu zuten arte. Guztira 31 hileko behin-behineko kartzelaldia egin du, eta gehienekoa bi urte da.

«Taldea armatuko kide» izatea egozten diote, baina «gaikile elkartekoa» izateagatik bete zuen zigorra, eta baliokideak dira. Hala ere, baldintzapeko askatasuna ukatzen diote, epaiketa laster izango dela argudiatuta, data-rik ez egon arren. Ihes egiteko arriskua ere aipatzen dute, baina, defentsak dioenez, aske egon zenean astero joan zen sinatzeraz eta bere semea Euskal Herrian bizi da.



**HERMES  
ETA GAIA III:**

Ingurumeneko Formazio Teknikorako Ikastaroa

**Sustengarritasuna eta komunikazioaren politikak globalizazioaren garaian**

IRAKASLEAK: Paul Nicholson • Juanxu Lopez Uralde • Iñaki Barcena • Xabier Arana • Iñaki Petxarroman • Helena Franco • Iñaki Antigüedad • Joana Mendiburu

**Otsailaren 17tik 28ra**

**UPV-EHU Leioako Campusa**

**Gizarte eta Komunikazio Zientzien Fakultatea**

**POLITIKA ETA ADMINISTRAZIO ZIENTZIEN SAILAK ANTOLATUA**

\* Aukera libreko kredituak emango dira (40 ordu)

Laguntzaileak:



